

Dxihtsi nin baca'h San Judas

Judas cagaca'h loh ra' bwiinn nin gullii Dxiohs

¹Na'h naan Judas nin ruhnn xtsi'n Jesucristu, nee naan bwihtsi Jacobo; cagaca'h'n dxihtsi rii' loh ra' bwiinn ra' nin gullii Xtaada Dxiohs nu'h, nin ruca'h duxa sto' Ñi'h la'hnu'h, nee gudihdxyi Ñi'h la'h nu'h tin gaca nu'h tuhsi cun la'h Jesucristu. ²Rna'ba'h'n loh Dxiohs gusacwachidxyii Ñi'h sto' tu nee guunn Ñi'h cumpañu la'htu, cun guni'hi ru Ñi'h guelruca'h sto' lasaa' ru lasto' tu.

Nin ruluu'yi ra' dxyi'dxyi nin ayi naa guchii

(2 P. 2.1-17)

³Bwiitsi ra'n, chin cayuhnn duxa'h'n lligaaba guhca'h'n loh tu xcweenta ziga ríaa xtuhlda ra' nu'h, bwi'h'nna'h'n lligaaba dxiooba guca'h'n tuhbi dxihtsi loh tu tin suh dzi'tsi tu loh dxyi'dxyi nin naa guelriachii sto' nin banaa para la'h ra' bwiinn ra' nin naa xpwiinn Dxiohs, ⁴laasii la'h paaldaa ra' bwiinn gulaa'dzi rala'n cun dxyi'dxyi rusagui'hi xteenn ba nin ruluu'yi ba. Bwiinn ra' chi nin rñi' loh Xchihtsi Dxiohs xcweenta ra'

ñi'h, nin nahpa ñichilohtii' ra' laasii naa ra' ba bwiinn ya'dxi ra' nin ruxi'n loh xneziuh Dxiohs pur nin naa ra' ba bwiinn gubwe'hextuhyi nin zeezahnee tuhbi guelnabahan yuu'dxi, nee rbwe'he sto' ra' ba la'h Daada Jesucristu nin rnabwa' la'h ra' nu'h.

⁵Nicala la'htu naann la tu, per xclaa'dzihn gusana'h'n sto' tu la'h Dxiohs, nicala babwe'he Ñi'h la'h ra' bwiinn Israel loh guihdxyi Egipto, per gudxiinn Ñi'h la'h ra' ba nin ayi gwachii sto' ra' ñi'h xchi'dxyi Ñi'h.

⁶Ya aanjla ra' nin ayi guclaa'dzi ñia'han hasta bazuh Dxiohs lah ra' ba, pwihsi biria'h ra' ba hasta guclaa'dzi Dxiohs dxia'han ra' ba, ni'chin nucwe'za Dxiohs la'h ra' ba loh nacahyi para loh dxyih ra' nin gaca jwisi cun yi'bi ra' ba cadehn nin banaa para tu'pazi, ⁷neezaa guihdxyi Sodoma cun guihdxyi Gomorra nee cun guihdxyi ru ra' nin nuu gahxu cwee' ra'n, ziga gahca bwi'hnn ra' aanjla ra' zi'chi za bwi'hnn ra' bwiinn guihdxyi ra' chi gubahan gubwihlli ra' ba pur xcweenta gunna'h biraalli ra' cun ndxi'hw biraalli ra'. Ni'chin banaa ra' ba para loh bwehla nin ayi dxiuu'yitii', ri'chi chuu ra' ba

para tu'pazi. ⁸Bwiinn ra' nin nuu loh tu naa ra' ba ziga ra' bwiinn nin galohyi bwi'hnn ra' duhlda. Nabahan ra' ba ziga nin basi'dxi ra' ba loh garaa ra' nin rñi' xca'lda, ruxi'n ra' ba tihxi ra' ba, rbwe'he sto' ra' ba xquelrnabwa' Dxiohs, rñi'yah za ra' ba xaanjla Dxiohs. ⁹Aanjla Miguehl nin r nabwa' loh ra' xaanjla Dxiohs, chin gudxihldxinee ba la'h bwiinn dxaaaba yihca tihxi guehtu Moisehs ayi biaalla Miguehl ñiñi'yah ba la'h bwiinn dxaaaba sola rahbi ba: "Daada Jesucristu zuhnn guelguxchisi xcweenta lu'h." ¹⁰Per bwiinn ra' rii' rñi'yah ra' ba xcweenta cohsa ra' nin ayi nu'nbwa' ra' ba, per nin rahcabwa' ra' bwiinn ra' ca naa ziga nin rahcabwa' ra' guidxa'h ra'n nin ayi xi xquelrihn ñi'h, ya zuhnnan para ñichiloh ra' ba.

¹¹iProhbi za la'h ra' ba!, laasii zeezahnee ra' ba xtsi'n guehtu Caín, ya pur guunn ra' ba gahn mweeyi, ni'chin biria'caa ra' ba ziga la'h guehtu Balaam, zeena'zu ra' ba lasaa' loh xtuhlda guehtu Coreh nin gudxihndxinee la'h Dxiohs per guñihchiloh ra' ba. ¹²La'h ra' ba naa ra' ba tuhbi xtuhyi duxa loh ra' xchih nin rahca la'n guido'; ayi guidxyihbi ra' ba gahwxchihnee ra' ba la'htu laasii ayi xi xtuhyi riiuu' ra' ba, sola xcweenta si xigaaba ra' ba riiuu' ra' ba. Naa ra' ba ziga zi xcahyi nin ayi xi ñihsadxiah rusiaaba, ya nezii-nezi'chi zeene bwih la'han; naa ra' za ba ziga zi yahga nin ayi xi ñinahxi rcah loh ñi'h chin radzihn chieempa nin gudi'hin li'hn, chiohpa bweelta guhchi ra' ba, naa ra' ba ziga tuhbi

yahga nin biya'dxu cun xtulbaa' ñi'h hasta la'n layuh. ¹³La'h ra' ba naa ra' ba ziga zi ñihsa nin riahsa loh ñihsado' chin ruteesa tuhbi biduhn la'han, ya naa ra' ba bwiinn gubwe'he xtuhyitii' laasii riaabariahsa ra' ba ziga zi ñihsado'; naa ra' ba ziga zi dxih llaa'ndxibaa' nin basa'bi xlahta ñi'h, rii ra' ba loh tuhbi guelnacahyi duxa nin bwi'hnn cha'yi Dxiohs para la'h ra' ba nin banaa para tu'pazi.

¹⁴Xcweenta za ra' dee' la'n guñi'laza Enoc nin naa llagado' Adahn, rahbi ba: "iBwa'ha!; ze'nee Dxiohs ziahan duxa ra' xaanjla Ñi'h" ¹⁵tin guunn Ñi'h guelguxchisi loh ra' garaa ra' bwiinn guidxyiyuh tin gusa'cazii duxa za Ñi'h la'h ra' ba pur garaa ra' xtuhlda ra' ba nin bwi'hnn ra' ba laasii ayi biu'nbwa' ra' ba la'h Dxiohs, nee cun xcweenta ra' dxyi'dxyi nayachi ra' nin guñi'yah ra' ba la'h Dxiohs." ¹⁶Nee rbahchi duxa ra' ba guelchiah cun naaza ra' ba bwiinn nin ruluu'yixcwihn ra', nee ruhnn ra' ba xi chi'h zi nin xclaa'dzi tihxi ra' ba. Rñi' za ra' ba garaaloh ra' dxyi'dxyi yachi neezaa rñi' ra' ba dxyi'dxyi za'ca loh ra' bwiinn ra' tin guunn ra' bwiinn ziga nin xclaa'dzi ra' ba gaca.

**Guelruu'yi dxyi'dxyi xcweenta
bwiinn ra' nin gwachii sto'
ra' ñi'h xchi'dxyi Dxiohs**

¹⁷Per la'htu bwiitsi lasaa' ra'n; gulgaza' sto' tu desde galohyi la'h ra' pooxtla xteenn Daada Jesucristu ¹⁸Guñi' ra' ba: "Loh luulchima ra' dxyih ziiuu' ra' bwiinn ra' nin gullihdzinee ra' xcweenta xchi'dxyi

Dxiohs, zuhnn ra' ba xcweenta
nin guiclaa'dzi chi'h zi ra' ba.”

¹⁹Bwiinn ra' squii' naa nin ruhnn
ra' para rlaa'ha ra' xpwiinn Dxiohs
loh lasaa' ra' ba laasii bwiinn ra'
squii' xcweenta loh guidxyiyuh
zeezahnee ra' ba, ayi xi Spíritu
Saantu xteenn Dxiohs nuu la'n lasto'
ra' ba.

²⁰Per la'htu bwiitsi lasaa' ra'n;
gulcheezah nayaa loh guelriachii
sto' xteenn tu nin ze' nez loh
Dxiohs. Per la'htu gulguinaaba
loh Dxiohs xcweenta guelnabwa'
xteenn Spíritu Saantu xteenn Ñi'h;
²¹gulguibahan loh guelnadzii'hi
lasaa' nin runi'hi Dxiohs, nee
gulcwihnasiin loh gaduhbi nin
cabweeza tu gadzihn dxyih
nin guni'hi Daada Jesucristu
guelnabahan nin ba gaca para
tu'pazi la'hnu'h laasii ralahsa sto'
Ñi'h la'hnu'h.

²²Gulgalahsa sto' tu nee
gulgahcanees la'h ra' bwiinn nin

nagahdxi chechiipa'h sto' ñi'h
xchi'dxyi Dxiohs tin chechii
sto' ra' ba xchi'dxyi Ñi'h, ²³nee
gulgahcanees la'h spaaldae ra' ba
tin garia'caa ra' ba loh duhlda
nin naa ziga zi bwehla duxa, cun
gulgalahsa sto' tu la' ra' ba; per
bwa'ha tin ayi chuu lu'h loh duhlda
nin ruhnn ra' ba pur xcweenta
guelnabahan dxaaba xteenn ra' ba.

Dxyi'dxyi luulchima ra'

²⁴⁻²⁵Dxiohs nin naa tuhbi dxi'h,
nin nahpa guelnasiin duxa, cun la'h
Jesucristu xteenn nu'h nin nahpa
guelnabwa' para gahpa la'htu tin
ayi dxiaaba tu loh duhlda, nee
guzuh Ñi'h la'htu loh guelbacha'h
roo' xteenn Dxiohs sin nin tuhbi
duhlda nee cun riahxi duxa tu;
Dxiohs nahpa Ñi'h garaatii' lla'ñih,
guelnabwa', cun guelguxchisi pur
xcweenta Daada Jesucristu desde
galohyi, nee nnah, cun para tu'pazi.
Zi'chi gaca pwihsi.